



Regd.No.19134/88 <http://www.kbc.org.in> NAIC2019
No-G-4/Regd./Magazine/KBCThuso/MNP-81

KBC THUSO

Kum 53 Ihinna

Ellha/October 2016

SO 450

SINCE 1963

MONTHLY

53 ISSUE
YEARS



WORKERS RETREAT 2016
KUMI BAPTIST CONVENTION

"Nalungthin
pamphala amangal kum lam
khangsi hung lala kit
avah"

CONVENTION TOGON NA NOUA
WORKERS RETREAT 2016
GOTHOL EPM MUNNA
General Secretary Rev. Ngamjapao Hoakip
hauhimna.

CHRISTIAN NEICHIN

NOVEMBER EVENTS

- * CHAPANGTE NIKHO - 06 *
- * SUNDAY SCHOOL DAY - 13 *
- * CEC MEETING - 23 *

John. 17:11

"Kapa thengz eim pumbhal lu bang a amaho jong
pumbhal eiltheina ding un. Manoman amahohi hong in"

CONTENTS

THUMAKAI HO

1. Editorial/ Faithfulness in Position	1
2. Lolhinna lampi /Rev. Paojangam Haokip	4
3. Pathen lungdol tah/Pastor Satminlen Khongsai	7
4. Mingaidam theilou lhachapa/Pastor Tingoulen Haokip	10
5. Hinkho neilou Houbung Sardis/ Pastor Houpu Haokip	13
6. Pakaijin manna nom naneije/ Pastor Lunminthang Haokip	15
7. Men Column	17
9. Women Column	18
11. Youth Column	20
12. Literature Column	22
13. Report/Hetsah	25-36

EDITORIAL BOARD

<i>Chairman</i>	: Rev. Dr. Hawngam Haokip, President KBC
<i>Editor</i>	: Rev. Ngamjapao Haokip, General Secretary
<i>Joint Editor</i>	: Rev. Silas Jangminlen Haokip
<i>Contributing Editors</i>	: 1. Rev. Letpu Kipgen 2. Rev. Henjalén Doungel 3. Rev. Onthang Haokip 4. Rev. Kaikhokam Chongloi 5. Pastor Paokhohao Haokip 6. Pastor Satminlen Khongsai
<i>Cir. Manager</i>	: Ms. Lhingjanem Haokip
<i>Design & Layout</i>	: Hemkholen Haokip

THUSO LAHMAN

Church/Organisation/ DepartmentRs. 200/-
IndividualRs. 100/- (Post a Rs. 200/-)

Indian Overseas Bank, Imphal Branch
A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 9612817768 Contact thei.
Circulation to kisai lam Mobile No. 9862633173 bol ding.



FAITHFULNESS IN POSITION

(Text.LK.16:9-13)

Editorial

Tunia kumsunga dinga Ellha (October) ihung lhun theijal'un kipa aum in, hichen gei ihin puilhung'uva Pa,Pathen chu thangvah in um taken. Chutoh kilhon in chung a kipe thupi ah khun chomcha ana kihoulim'u hiute. Kitahna kitihi Christiante umdan/ chondan chule hindan ding doltah chu ahi. Ajeh chu pathen kom tilou eiho mihem lah jenga jong kitahna beijin mi koima pachat achang thei pon ahi. Koima sei- phat jong achang joupon, koima tahsan na jong achang thei deh poi. Hijeh a chu a ojapu (master pa) angsunga tahsan changthei lou mi chu mi kitahlou tina ahi. Hichetoh kilhon nin chung a thupi toh kisaijin point thum kahin tah lang nom in ahi.

1. *The faithfulness charecteristic of Christian. Vs. 9, ah chun," chondih louna sum in jol le gol kiseum un," kiti akimun ahi. Mitheng Paul in, ijakai aphasoh keijin, ijakai bolthei ahipoi, atin ahi. Pathen deija kimang cha or Pathen lenggam n- toh na a neile gou kiphah chu Pathen in phat thei aboh ahi.*

Vs.10, chu isim leh themcha chung a tahsan um-lou ho chu tamtah chung a jong tahsan umlou ding ahi. Themcha chung a chondih lou chu tam-tah chung a chondih jilou ahi ati ahi. 1978 kum in kapute ti ding khat toh Bazar a kache lhon in Longpant khat kaki khuisah in kei chun ima kak-hohsah lou ahin amachun keiman thilkhui ho koma hinladoh nang'e atin, hichea chun Rs.3/- ahin neguh in ahi. Thil khui man chu Rs.12/- ahin aman Rs.15/- kahin pei atin keikoma Rs.3/- akilah valin ahi. Keijong thil khuipa koma amapa het louvin kaga chen kadoh leh thilkhui man chu Rs.12/- bou kalai atin ahi. Hitobanga chu neo cha cha a kisuh minset na ding thil tamtah um ji ahi, chihthei angaijin ahi, sopite ho. Mi kimu setsah lou aphai, chugoh hilouva Pathen chate khat hina a faithfulness characteristic nei jing angai-jin ahi.

2. The conduct of the unfaithfulness/selfishness.(vs.11,12) Christian khat hija Houbunga Hopsom, Maicham apeh ding dol pelou ho khu mipha ahipouvin ahi. Kichat um-tah ahiuve, mihem thilgu ho bon kichat aum u leh hiche sanga Pathen thil gu ngam ho khu tijat umtah leh kichat umtah hilou diu ham. Greedy people, kiti mi kilose ho or neipap kilose ho kiti chu amaho ahiuve. Bible in, Chondih louna sum chung a bon tahsan na um lou'u le sumtah kon na nganse'uva nachinsah dingu ham, atin ahi. Hichu lei-set hinkho kiman chahna a ithudih thei lou le lhagao thu lam'a ipi ti ikitah thei dingu ham? ti ahi. Syria sepai jalam-kai pa Naman in ati phah natna chu Elisha Themgao pan asuhdam peh jeha kipaman thil peh ding ati chu Themgao pa anom tapon, ama koma apotdoh chun asohpa Gahe'zi kitipan anung delin dangka talent nile golvah von ponsil ni akilah tan ahi. Hichu apupa Themgao Elishan ahethat in

Gahe'zi chu agaosap tan ahileh apet tah in Naman phah bang bangin aphah tan ahi, (2Kgs.5:19-27). Chondih lou kitih Pathen in adeipon, mihem in jong adeipon ahi.

3. Justify themselves before men,(Vss.1-8).

Ama le ama lungthim them kisa/ bol thei kisa, hiche ho chu Pakai Jesun,"Vannoi chate hi amaho khang mite dingin khovah chate sangin aching jo'uve" atin ahi,(vs.8). Eg; Israelte chu Yahweh Pathen a konin ana vahmang'un, amaho chu Mose dan thupeh jui jin akisei'un, ama vang pathen in amaho a konin amai ahei mang tan ahi. Pathen lung gel le ama lung gel kimat sah ho bou chu atohna le adin mun ho ah thutah in ading jou un ahivu. Eima le eima them kichan hin Pathen alung lhaisah thei pon, ama vang eima them mo kichan na pathen angunga kipeh lut chun Pathen anga midih eisosa joh ding ahi ti geldoh pumin hinkho mang leu hen dei aum jon ahi.

Achainan :

Sopiteho, malai mite ho jong chu Pathen angunga kitahna hinkho ana man ji tengule Pathen lungset, or hepina ana chang ji un, chutilouva ama hole ama ho them ahung kichan uva Pathen ginna ahin neilou tengule Pathen in gotna lam chom chom a konin ana peji un ahi. Vetsahnan: Pharisai pa chun Taona aneijin, vo Pathen kei hiche kaidong pa tobang kahipoi,na min kathangvah e, hapta khat sunga ni vei an-ngol kahin, Hopsom phatah in kapen, midang banga human a mithil lah jong kabol poi, tin ama le ama them akichan in hatao vin ataovin ahi. Kaidong pa vang chu dahdoh ngam louvin lungthim kish tah in Pathen mai ven alung gil'a atao tan ahi. Hiteni chu kojoh atona akisang dem tin Pakai Jesun thulem aseina a chun imu'vin ahi,(Lk.18:9-14). Kitahna "faithfulness" kitih Pathen mite a dinga ngaichat khoh pen khat chu ahi ti geldoh pum in Christian jousen hinkho mang cheh leu hen leiset chungah hin anom mo kiti mun(place) umponte tin kagelin ahi. Pathen in asim ho jousea dingin phat thei iboh peh tao hen, Amen.

LO LHIN NA LAMPI

Rev. Paojangam Haokip
Pastor, Gambih No. 1

JOSHUA 1:1-8

“Hiche danthua keithusei jouse hi nakamsung toh kichet louhel ding, nangman sun le jan na nagel jing jenga asunga kisun jouse bang banga nabol doh thei nadia nachih thei ding ahi;chuti hen lang hile nache nachan na nakan toutheiya phatah a nalo lhin thei ding ahi.” (Chang chabi-Is.1:8)

INTRODUCTION:

Chunga Bible chang kipe hi phatah a isim leh lolhin na ding leh haothei nadinga achang chabi (key verse) ahi. Mijouse hin hinkho a alolhing pen hiding leh ahaopen hiding hi adeicheh in ahi. Alangkhat kitna chun hinkho a losap kiti jong hi nomlou tah ahi kit ne. Losap jeh a ama le ama kithat(suicide) leiset chungah mihem simsen lou a ume. Chapang lekhasim hon jong lekhatem tah hia lolhin ding adei uve. Kivei mihon jong akivei na lolhin ding anom uve,sport kichem hon jong goljona lolhin ding adei uve. Loulhou mihon jong lolhin ding adei uve. Election tet hon jong lolhin ding adei uve, galbol hon jong lolhin ding adei uve. Mijouse hin lolhin ding idei soh kei uve. Pathen hin losap nahi adeiham? Adeipoi. Vetsah nan, Gen.39: 3 sunga chun Joseph chu Pathen in a umpi jeh chun imalam jouse a abol na atoh na channa alolhin imuve. Chukit leh 2Chronicle 26:5 sunga chun

Amaziah chapa Uzziah chu kum 16 alhin in lengin ana pan sah un Pathen atah san jeh chun Pathen in ima lam jouse a akhan tousah in chule Jerusalem a chun kum 52 jen lengvai ana hom jouvin ahi. Joshua henga Pakai kitepna chu ahileh, Pathen danthu dungjui tah a hinkho aman na ahileh, lolhin nale khantouna dih tah amu ding ti, aseijin ahi.

Joshua 1:1-9 sungi mikhat lolhin thei nadinga boldingho kiseina ahi. Pathen in milolhing ti-a aseihohi, itobang ahidiovem? Pathen in milolhing ati ho chu;

1. KOI HILE PATHEN THILGON SUNGA LUT HO AHIOVE (One who enter the plan of God). Chang 1-4 sung chu isimleh-Joshua chu Pathen thilgon/tohgon tongdingin ahinkho apedoh e ti akimun ahi. Israel te lamkaija pang Mose khelding chun akisemtan ahi. Joshua chu Pakai tohgon na

sunga chun alut tan, Pathen kouna le solna chu angaiyin, atohgon ho tongdingin akipe doh tan ahi. Hito-bang chun, Pathen in nang hinkho-a jong thilgon le tohgon aneiya chule mijouse hinkho ajong anei soh keiyin ahi. Pathen thilgonho ihinkhouva isuh bulhit teng uleh-lolhin thei dio ahi. Ajuh chu Ama lungdei lama icheova ahileh Aman eilam kaidio, hilai munna chu lolhin najong imudio ahi.

II. KOI HILE PATHEN UMPINA A KIPAH JINGHO AHIOVE: (One who enjoys the presence of God).

vv.5 & 9 last part sunga chun, Joshua henga Pathen kitep nachu ahileh, kalhacha Mose kaumpi bang banga Nangjong kaumpia; kakisuh mosah louding chule da jong kada lhah louhel ding nahi,ati. Pathen in jong akitep na bang bang chun abollin ahileh Joshua'n jong lolhing tah in, Israel te chu canaan gam Khoiju le bong noi lonna mun chu apuilut tan ahi. Hiche hin avetsah chu, Pathen umpi na ichan teng uleh dihtah a haonale lolhina ichan dio ahi tihi akichen in ahi. Pathen cha dihtah hovang, Pathen in phatseh le nidanseh in a-alhonpijingin, itih injong alha kang ngai poi ti iheove. Israel te chu Pakaijin alhonpi jeh chun mihem pal dinga kilomlou Jordan vadung tui chubanga kikhang chu apal galkai thei uve. Pathen umpi na kicheh tah a heho dingin vang kichatna le tijat nahim him a umpoi. vetsah nan, David in, "Keiman thina

phaicham lim jot pa jongleng thilse kaging tapoi, Ajuh chu nangman neilhonpin, Natengol le namoljol chun neihongjingin neilhamon nai," ati.(Ps.23:4) Peter chun Pakai toh a umkhom chu nom asah beh seh jeh chun, "Pakai hikoma i-umu hi eihodingin anome, naphasah le nangding khat, Mose ding khat, Elijah ding khat, lhambuh thum songin kate,"ati (Mat.17:4). Pathen umpi na chang ho chu lolhin na keo hilouva kipa nale lungmon na jong anei ju ahi.

III. KOI HILE PATHEN THAHAT NA HE KHA HO AHIOVE.

(One who experiences the power of God): Chang 6,7 & 9 sunga chun Pathen in Joshua hengah hat in lang hangin tin thu apen ahi. Hat inlang hangin kiti ho chule Pathen thupeh ho jouse hi Pathen in abol thei ngen chang ahi. Gen.18:23 ivet na ahileh Pathen in Sodom khopi chutobanga nasa chu mei le kat in asumange ti imuvin ahi. Hiche, Pathen milungset nale thahat na, Mose le Joshua henga akitep na bang banga chu eiho dinga jong;Lhagao theng lima isunguva cheng chun eipanpi dinguva kitem ahi.(Jn.14:16-17). Ipi chu hitaleh, thudoh khatchu, Lolhin nachu iti imuthei dioham? Pathen thilgongsunga lut theina dinga ipibol dingham? Pathen umpi na a chu iti ikipa dioham? Chule Pathen thahat na chu iti ihet thei dio ham? Hiche thuguh chu ipiham? Aboncha-a thuguh chu chang 8 sunga kisei,

Pathen danthu kisei dungjuija thildih bol ding hi ahi. Noiija hin lolhin na dinga thuguh kalbi thum ho ana veo hite.

LOLHIN NA KALBI THUM HO: (verse 8 sung)

Kalbi khatna : Lohina dinga kalbi masapen chu, **“PATHEN THU SIM-JING,”** “Danthu-a keithusei jouse hi nakamsungtoh kichat lou hel ding ahi,”ati hi, ipi ase na ham? Nehding tina. Lhagao an na pangding tina ahi. Nenlang kipah jingin,ajehchu hiche bou chu nalhagao an-nal-hagao hinkho hinthei na chu ahi. Bible hi regular taha simjingding tina ahi.

Kalbi nina: Ani chan na kalbi hi, **“PAKAI THUSEI SUN LE JAN NA GEL GEL JING DING.”** Bible hi ikichoi jing dio isunguva ilut sah dio ahi. Pakai thusei hi kamsunga kichet louding keo hilouva- “Sun le jan’a gel gel jeng ding jong ahi.” Hichu ilungthim sunguva khumlut ding tina jong ahi.Col.3:16 sung chu ven.(Christa thuchu nasunguvah chengdimset jinghen). Bible simjeng seh a bulhingding, chamkim jeng ahipoi, isimdoh u thudih chu isunguva ivallut diu, ilungthim gilsunga hi ichensah diu ahi. A thu “geljing”(meditate)ding ti, avetsah na chu; Bongho in an aneh u akamsunga akikhoh uva alup tenguleh alhai lhai tobang khu ahi. Hijeh a chu eihon Bible ikilah uva isimdiu chule Pathen in eiho dinga ipijeh a-ajih

ham ti study ibol diu ahi. Chule itou uva athudih kisei chu ilungthim sunguva igel (meditate)diu ahi. Meditate kiti thucheng hi,“dilsuh a kun” tina jong ahi. Ichunguva thunei vaihom ho thunoija kund-ing ti vetsah najong ahi. Sun le jan na ama thunoija kunding tina jong ahi.

Kalbi thumna : Athumchan na kalbi hi, **“DANTHU A KISUN BANG BANGA BOLDOH DING.”** tina ahi. Athudih imu doh ho chu ihinna a boldoh ding ahi.Titus 2:10 & Jac.1:22 ven. “Ahin nangho nangma le nangma kilhem lha a thu angai maijenga hilouvin thu chu abola joh hiuvin.” Pathen thusei minthang, Moody kitipa, ahinkho a athupi (Motto) chu; 1Jn.2:17 hi ahi. ‘Vannoi leiset le athil ngaichat mangthah dingkon ahitai; ahinPathen lunglam’a CHONPA chu imatih channa umjingding ahi.” Hiche thucheng hin lolhin na dih tah hi asimdoh in ahi. Chule thucheng, “BOLDING” kiti hi athupi pen ahi.

THUKHUMKHANA: Hiche kalbi thum hohi hinkho a lolhin thei nading le haothei na dinga kalbi dihtah lhagao thuguh chu ahi. Bible ingailut uva isim jing dio, ilungsunguva ikikhumlut uva, ihinkho-a pangjing ding, ithilbol jouse control ibolsah uva chule ichonchan jouseo kikhelsah na a iman diu ahi. Hiti-a ibol tenguleh, ilampiu chu haothei nale lolhin na phatah hiding ahi.

YOUTH DAY THUPI PATHEN LUNGDOHTAH

*Pastor Satminlen Khongsai
Secretary, Youth Department, KBC*

S E R M O N

“Keiman keima lungdoltah mikhat Jesse chapa David kamudoh tai, ama khun kalunggot jouse abol bulhit ding ahi” ati (Acts 13:22)

Thumakai:

“Pathen lungdoltah” kiti thucheng hi ngainom umtah ahi. Semtil apatna Pathen in asemsa leiset mihem simsen lou hijongleh hiche thucheng kibapeh ana umpoi. Bible ah Pathen mitah tah le Pathen in amanchah tahtah tampi umjeng jongleh “Pathen lungdoltah” anati hi koima jouse chungah ana phongdoh pon ahi.

Hijeng jongleh Pathen in amacham tah a adeisah David chu Israelte lengdinga analhendoh keu hilouva “Pathen lungdoltah” ahidan jong ana phongdoh tan ahi. Hichan geiya Pathen lungdol tah ahung chan theina hi ivetleh David hina jong, Pathen lungdoltah achanthei najong umteiding ahi. David hinkho hi ivetleh alhahsamna, alosamna, achonsetna, alohlinna akimusoh keiyin ahi. Hichan hinkho ahin neinung a ipi lomlom hina aneiya “Pathen lungdoltah” kitihi changthei ahidem?

David hin Pathen tahsanna dettah aneiy.

David hinkho thusim akisim’a kon in Pathen dettah a atahsan dan kichehtah akimuna pen chu 1 Samuel 17 sungi ahi. Khangdong cha ahinah lai jeng vangin Pathen tahsan najallin Philistine

milen mihatpa chu ana thatjouvin ahi. Hiche hetthei nachu athusei doh “Pakaiyin keima sakeibahkai tinhem laha eihuhdoh a, vompitinhem lah a jong eihuhdoh a ahileh, hiche Philistine mipa khut’a kona jong eihuhdoh teitei ding ahi” (1 Sam. 17: 37). atina ah kicheh tah a mudoh ahi.

David chun ana hetchet chu ahileh Pathen hi imajouse chungathanei ahijeh in thiljouse ama khutnoiya um’a aman adeidei aboljou dan chu kichehtah a ana tokhah a ahetchet anahitai. Ito-bang tijana kichatna umjeng jongleh Pathen in ahuhdohna ahin tokhahna jouse jong ahetchetjeh

chun kichat tijatna imacha ana neipon ahi. Aneova patna Pathen tahsanna neitah a hinkho manding kitihina ana chepijing anahitai. Hichan geiya Pathen ana tahsanna pa chun Pathen lungchang anatohkhah a Pathen a konna kipana ana chang ahi. Hijeh chun Pathen in David avetchun "alungdoltah ahina anamudoh in, changjong ana chantan ahi."

David in Pathen danthu angailun ahi.

Labu bung 150 aumin hiche ho chu asun chomchom anahi hijong leh alhangpia David sutna kihe chu ahi, ijeh i-nem itileh amasut tampen ahi. Hiche La anasut houchu akivet leh munchom chom a hatsahna gentheina tampi anato a kona ana sut ahi, hijeng jong leh Pathen danthu angailutna ana phongdoh jingin ahi. Hiche ho lah a chun Labu 119:47-48 sunga hin hitin akisunne, "Ajuh chu nathupeh chengse hi kakipana ahin, Hiche hi kadei jing ahi. Kadeitah nathupeh chengse chu giltah in kagel'in, Nachondan hohi kagel jing ding ahi" ati.

Pathen danthu ajana le angailutna kichehtah a mudoh ahikeu hilouva hiche Pathen danthu hoa alungthim'a agella Pathen danthua kikholna aneijing ahi. Pathen thu ngailutna le khosahna jeh chun Pathen in David chu Pathen hettheina le Pathen thu ho hettheina ahinpejing in ahi.

Hijeh chun aman jong Pathen thu a kibulphu anopdan ana hetchet jeh chun "Adihlou bollouva Pakai lamlah jui jing jong anun nom." (Labu 119:3) anati.

David hi Pakaiya kipahjing ahi.

Mihem khatchun Pathen toh kiguijopna dihtah aneipouleh vannoiya thilsoh ijat umhen, hatsahna gentheina ijat kimaitopi jengjong leh Pakaiya kipana aneijing ahi. David hinkho jonghi lohinna jeng le kipana jeng anatoh dehpoh hijong leh Pakaiya kipana dihtah neijing hinkho aman ahi. Hijeh chun hitin aseiyeh "Chutileh jumna kamu louding, Nathupeh jouse kavet vet jeng ding ahi! Nachonna dandih ho kasimdoh teng leh Lungdih pua nangma kavahchoi ding nahi" (Labu 119: 6-7).

David hin Pathen a kon in lungmonna, kipana, khantouna, hao-satna ana nei jengseh a kipah ahipon gentheina, thina thei changei hahsatna le tijatna tampi ana neiyeh. Ahin Pathen phatna amuchet jeh chun Pakaiya kipah tah a hinkho mangjing thei mikhat ahin, hitobang hinkho lah jenga jong Pathen thangvahna ding lampi amudoh jingin ahi. Anei chung hihen, athilto chung hihen, agentheina chung hihen, ahaosatna chung hijongleh Pathen thangvah theijin ana umjing in ahi. Hichu David hina kimudoh khat ahi. Hijeh chun "Thangvah

pumin akelkot phunga hun-glut in, Vahchoi pum in ainpia hunglut'un, thangvah-un amin choianun" (Labu 100:4) anati.

David hin kisahna dihtah anei-theiye.

Pathen thu in "Nikhathi nilhahl-am ni kihei doh hin David jong alupna jalkhuna konin athoudoh-in leng inpia inchunga chun avah len ahileh, inchunga kon chun numei khat akisilpet tah amun, anumeinu chu amel hoi l'leh jengin ahi. Hijeh chun David'in mi asol'in numeinu chu koi ham tin agadohle sah tai. Hichea hin mikhat chun, "Hiche ni hi Eli'am chanu, Uriah, Hit mipa jinu Bethsheba kitinu chu hilou haimo?" tin aseiyee. Hichun David in mi sotolle ho sollin amanu chu agapuisah leh, Bethseba jong David henga ahung lut in, chuin David in amanu chu aluppi tan ahi" (2 Sam. 11:2-4) akiti. Hiche laimun hi David chonsetna kichehtah in akimudoh in, hiche achonsetna chun mijitoh jonna, jouseina le tolthana ahung sohdoth tan ahi. Nathan koma chun hitin ana seiyee, "Keima Pakai dounan kachonsetai" (2 Sam. 12: 13) ati.

David in achonsetna sellou hella ana umchun Pathen kipana tah le lunglhaina tah anahidoh in hichun ahinkho setna lampi a kon a hinkho thah lam ahinjotsah kit ahi. Hiche achonsetna kisahna jeh chun Pathen komah "O Pakai

nalungset longlou ahin, Hijeh chun keima neikhoto thalhingset ahijeh-in Kasuhkhel abonchan theh ngimsel jengin. Kathemmonaa konin neisil thengin lang, Kachonset a konin neisop thengsel in!" (Labu 51:1-2) anatin ahi.

Thukhumkha:

David chu "Pathen lungdoltah" ahung chantheina jeh tamtah umjeng jongleh phabep khat iseidoh u ahi. Hichenga kona jong jildoh thei tampi aumme. Khangdonlai, khanghoilaiya Pathen tahsanna dettah neiya, Pathen thu ngailutna dihtah neiya, athu simjinga, geljinga hinna neipi a chule kipuisahna hinkho manga, itobang kitoh jeng jong leh Pathen thangvahna thei mudoh jinga, chuleh Pathen deiloulam hinkho manna le chonsetna a kibolna a konna kisahna dihtah nei khangdong jouse "Pathen lungdoltah khangdong" akihi theiye. Koiam khandon laitah a chonsetna a kona thengjouva? Koiam khandon laiya Pathen thu gelsangna nei? Koiam khangdon laiya imalam jousea kipah jing? Koiam khandon laiya consetna kisahna dihtah nei? Hicheng jouho chu Pathen in mapuijin tin, David lohinna, haosatna, mapuina, umpina changing ding ahi. Pathen thu ama lungdihtah a tahsante, kipuisahte, lolhing in tin leilam phatthei jong chung a kon'a changjing ding ahi.

MINGAIDAM THEILOU LHACHAPA THULEM HI IPI KISEINA HAM ?

By: Pastor Tingoulen Haokip P.A. to General Secretary.

MATTHEW 18:23 – 35

Hiche Mingaidam theilou lhachapa thulem hi Matthew 18:23 – 35 sungin bou akimu'e. Hiche ahin, Seijui Peter in Pakai Jesu jah'ah, "Pakai, kaso-pin kachunga ijatvei achon-set le kangaidam ding ham? Sagivei geijin em?" chuleh Jesun ajah'a, "najah'ah sagivei geijin katipoi; amavang sagi munsom sagivei geiyin katijo bouve" (Matthew 18: 21 - 22). Hilai mun'a thu kisei ahil-ouleh kisun, asungthu/amun achang toh kitoh'a, Jesun aseijuite "Pathen lenggam/Vangam" thudol ahilna ahi. Eihon hiche thulem akonna eima eima cheh hinkho'a manchah thei thudih umho hi ikilah dinguin apha.

Talent sangsom chung aapa-kaipan angaidam sohpa/lhacha pahin, asoh chankhom pi khat in denarii jakhat (100) abat hi ngaidam ding anom

tapoi. Chulai phat'a denarii khat hi nikho tha man ahi chuleh denarii khat hi tulai Cent somle gup (16) mandan toh kibang ahi. Hiti ahijeh chun, soh masapa kingaidam najat tohchun tekahna in-eija ahileh, hiche hi lhomcha khatbou ahije. Hilaija thutah juithei thei chu, "ngaidamna tamtah/sangtah chang mikhat chun tamtah'a midang jong angaidam ding ahi ". Lahdan chuomjep'a seidingin, Ngaidamna chondanna thoding kitihin, Ngailutna ahilouleh Midang ngaidam ding hi akhonna/angahna aumpoi tina ahi. Seijui hochun midang angaidam teng uleh amin-gaidam jat uchu asimlou dingu, hitah sanga chu, thulem in ahilna banga chu, amahon jong Pathen in sangtah'a mi angaidam banga chu abol dingu ahi.

Lhacha mingaidam theilou pa thulem ahin, Jesu Christa in Ephesus 4:32 sunga kisei, "chuleh nangho kihepito cheh un; lungnem'un Pathenin Christa'a nangho nangaidam banga chun, khat le khat kingaidam'un, kitina'a hin ngaidamna chungchang'a tahsan chateho thupehna kineitoh kisamkaija juinding thilthah hetsahna/musahna aneijin ahi. Jesu Christa in aseijuite hi cross masang thu ahil ahije, chuti ahijeh hin, Ngaidamna kitihi houbung umasang le umjouva kibang ahi. Pathen in eiho Ngaidamna ichan jeh uva, eihon jong midang ingaidam ding u ahi. Hiti ahijeh chun, eihon lungset tamtah imu jeh uva, "ajeh iham itile eiho chonset'a ium laitah un Christa eiho khel'in athitan ahi" (Romans 5:8), hiche lungsetna mama chu midang ipeh diuin thupéh ei-kinei uve. Mingaidam theilou Lhachapa thulem achun, soh masapa bat hochu ngaidam'in aum'in, chuleh hiche mipa'in midang angaidam lou thu kijah kahsen abat sahding thu ngaikhoh na'in akikoi tapoi. Tekah din-

gin, eiho chonset man jouse Christa in asah theng ahitai, chuleh hiche jengseh achu Pathen mingaidamna umthei ahi. Pathen angunga eihon ibat cheh'u ikisah theipouve ahilouleh, Sochatna ikilamdoh theipouve. Sochatna/Huhhingna kitihi Pathen akona lungset manna thilpeh ahi (Ephesians 2:8 - 9).

Hiti ahijeh hin, mingaidam theilou lhacha/sohpa thulem ahin, Jesu Christa in Ngaidamna kitihi ahina thei channa, ama akingaidam jat dungjuija midang jong angaidam ding tin, aseijuite le eiho eiho jouse ei-hil uvin ahi. Lhacha masapa chu abat jouse kingaidam ahi, chule amajong chun midang bat jouse angaidam ding tina ahi. Hitobang chonna toh toh'a, tahsan vanga Pathen cha khat chu, Jesu Christa jalla achongset jouse kingaidam ahi. Hijehchun, phatkhat khatleh, koiham khat chun ichunga thilse abolham ahilouleh chonsetna abol teng chuleh, eima cheh jong hi lungset najalla bat jouse kingaidam ahi tihi geldoh'a, eihon jong lunggotna

neipum'a kipah tah'a midang ngaidam ding ahi.

Thuchaina:

Chunga mingaidam theilou lhacha/sohpa thulem hi chomcha ahi, ahin asung thu hi phatah'a igel tengleh, anatoh'a juinding tamtah aum'in ahi. Hijehchun, Christian khat hina'a hin nadinmun ahilouleh kadin mun itobang em tihi eima le eima ilunggil sunga hin kidoh jing angai jin ahi. Hiche lhacha mingaidam theiloupa dinmun'a hi ium khah uvem, ahilouleh, Pathen in chonsetna lha mihem te angaidam banga hi dinmun ineijing uhi nam? Kikhol phat angaitan ahi. Christian hinkho ahin, thildang dang hohi athupi poi tina hilouvin, ngaidam thudol'a ilutji teng hiche dinmun ahin, Christian-te hi akiboiden jitan ahi. Hilai munna boina hohi itidan'a sohдох jiham tin khat le khat kikidongle, kisum selna, kingsetna, phulahna, kimit thipna, phatlou jeh, kiletsah jeh.....chuleh adang tampi kikohдох maithei ahi. Sopi-teho, hitiho jouse hi mihem'a um ahilouleh, Christian hink-

ho manchah dan itheplou jiteng ahilouleh, penthahna hinkho imanchah jilou teng lehin, eima tah'a konna midang ngaidam dinghi hahsa kisaji ahije. Ngaidamna dinga hi Pathen in nangle keija konna sumle pai a-ngehpou, sana dangka a-ngehpou, ngeh jongle mihem'in kipejou louding ahi, hijeh chun manbeija ngaidamna hi eipeh joh'u ahilouleh. Bible ahin, melma ngailut dingdan akiseije, sopi hengle kom ngailut dingdan akiseije ahileh, tuni nikho'a hi namelma ijat nangaidam khah hitam? Nasopi sukhel ijat-vei nangaidam khah hitam? Lunggil tah'a gel angaijin ahi. Tekahna bang khat'in, tuhin nahinkho mollem jeng tale, ngaidam manlou mi ijat nalhalha dem??? Phat apha tapoi, hijehchun apha dungjuija sukhel ineileh ngaidam thumdingin kho-ngaisot pou hite, chuleh, min-jong ichungga sukhel aneileh lunggotna neipum'in, kipah tah'a ngaidamna neijing uhi.

Achainan, Mingaidam theilou lhachapa thulem simдох hohi jouse Pathen'in phattheina naboh tauhen, Kakipah'e.

HINKHO NEILOU HOUBUNG SARDIS

*By: Pastor Houpu Haokip
C/C Salem Village Sapormeina.*

Text: Rev.3:1-6.

Background: Sardis kiti khopi hi lhanglam Thytira a kon a mile 30 a gamla a um ahi. Hiche khopi hi munnin achenguvin ahin akhopi pen chu muol chung ahi. Amaho hi akilet sah lleh jengun ajeh chu khopi sunga chun stadium chuleh houbuh tam tah ana umin ahin akisa chai khatcha jong ana umpon ahi. Khopi chu abang songa kikai ahi phaicham lam a vang ima ana bolpouvin ahi. Molchunga um khopi chu Acropolis khanglai chun ahung kibulo tan koi kiletsah malah khopi chu asang aja in thinan ana neilo tan ahi. Tun vang khopi chun lhan phung ahung soh doh tai. Alangkhat ah Sardis khopi chu hiche khanglai chun tha nei tah khopi chuleh somkol veina lam a thalhing tah tichu sana (silver) kiveina lama hi Aegean Island to hin ana kikhut jop a ahi vangset umtah chun 60 AD lai chun ling hattah kihot chun Philedelphia chuleh Laodicea jaonan ana chim lha tan ahi. (Five junction & False teaching by Corinthus about Gnoticism).

Hiche Sardis hi houbung 7 ho lah a khoh pen houbung chu ahi. Pakai in asej in nangma hi athi nahi tai ajeh chu nangman lhepna gentheina imacha namu poi ama hon agel un keiho hi adih kahiuve ti ngaito na anei ui vangset umtah in amaho hi lhagaova athisa ana hiuve. Ipi jeh a chu athi kitiu ham iti leh hiche houbung hi leiset chung a cheng non Christian ho toh aki khetna imacha hetkhen theina mudoh thei ana umtapon ahije. Amaho Pathen tahsanna chu Pakai lahthei dol ahung hitapon ahi. Ajeh chu amahon non-christian achen khompi hou toh chun akikhetna tichu chonchan lam hihen lang ipi lam hijongleh akibah lounao ana umtapon ahije. Hijeh chun hiche Houbung chu chamdel in ana umtheijun, hijeh chun Lhagao lhahsamna lentah ana neijun ahi. Alangkhat ah hiche khopi a hin houkhat ana umin hichu Artemis aki tin amaho tahsan chu thijongleh hen avel in akipengthei e ti atahsan un ahi. Hitobang hou kito pi lou ho to jong chun kinel kalna kibaotamna tichu Pakai in angansena bangin ana chontapouvin hijeh chun hiche ho jouse to hin kicham del

in ana cheng khom uvin ahi.

Ahin Sardis houbung hi athi dih tah chu ahipoi tichu tahsa thina ahipon lhagao lam lengvaina, lhagao lhahsamna ana nei u chu ahijon ahi. Ajeh chu Pakai in angansenaokin abol lou jeh u chu ahi. Hijeh a chu Pakaijin khang un hahjingin um mun ati ahi (Eph.5:14) "Hijeh chun aman Vo imumil khangin chuleh athi lah a konin thoudoh in chutengleh Christan nangma nasal vah ding ahi ati"

Chujongleh (I Pet.5:8) na in jong hitin aseije hichu "Limgeh chan umun kihong phaovin, naki doupio diabol chu Keipi bahkai kitum bang nga koi kaval lhum thei dem ti'a hol le'a vah lea ahi" hijeh chun hiche Houbung 7 hohi Pakaijin kitepna khatcheh ana peh ahije hichu koi hileh hiche lhepna jouva chu Ponbang vamvel sil'a keima toh kavel dingu ahi ati. Hiche a Ponbang in avetsah chu Pathen thenna chu mihemte thenna a kisim ahitai. Ajeh chu Pakai chonphatna chu eiho eikipe vah ahitai. Hiche akan gin avetsah kit khat chu Pakai thudihna le athenna chu avetsah ahije. Hiche a kisun dungjuijin koi hileh Pakai lungdei lam'a um miten vang hitobang von kang chu aki ah dio ahi tin Pakaijin aseije. Chuleh amaho min chu hinna lekhabu a konna kinoi mang talou hel ding ahi ti jong Pakaijin aseije (vs 5), hiche hinna lekhabu kiti a hi huh-

hing changsa chate min chu kijih lutji anahije.

Alangkhatnah (Lk. 10:20; Rev.20:12,21,27) hiche a konna eihon ihetdio chu tahsanna ahi iumjing lou uleh hiche hinna lekhabu a konna imin uh kinoi mang ding ahi tihi sumil pou hite. Koi hileh hiche leija alen lai ja Pakai sumil louva a Pakaija dia dingdet jing tichu Pakai seilep lou michu Pakai in jong apa masang nga aseilep lou ding ahi ti i-Christian hinkhouva isuhmil loudiu apoimo leh akul khatchu ahije (Matt.10:32-33). Ihet jing diuva pha chu Pakai hi Pa jet lam'a touva eiho dinga tao jing jeng ahi (Rom 8:34; Heb.7:25). Hijeh chun eihon Pakai chu tahsan jingu hitin phun noi louvin ama hengah tao jingleu hen eiho dia kipa na jona loup chu hiding ahije.

Vo Christa a Houbung mite tunin Pakaiyin eiho koma jong thu ahinseije hichu lhagao hinna chuleh tonsot kipana Pakai koma gilkel dangchah sil leh chen ngai chat um talou muna dia eikou'u ahi. Koi ham Pakai kouna donse louva chu! Ama chu ahin pet jenga jong athisa ahitai. Avelin gah geldoh kit'u hite Sardis Houbung mite chu tahsan ahing naovin Pakaiyin vang nangho hi athisa nahiuve tin John mangchan lekha tichu thuthot ana neie. Nangjong kikhoh in phat hoi nanei petcha ahi sumil lou jenin Amen.

HOUBUNG LEKHA THOT “PAKAI YIN MAN NANOM NA NEI E”

(1Cor.1:26,27)

(Base on my Testimony)

Achung a Bible text leTopic a kon a hin keima hinkho thusim adeh in Nepal gam a ding a Missionary a dinga kana vaikon ding kon lai ka lunggel kangaito le tua amun kalhun jou a Pathen phat thei nale avangboh loup ka chan naho muntin a KBC Houbung mitheng te kom a kahin phong doh nom in ahi.

Assam Karbi Anglong (Amrajan Mission Field) a kanaum lai in KBC Head-Office (Mission Dept) akon in transfer letter kana muin ahi, hichi laitah a kalunggel a kagel masat pen chule kangaito masat pen tah chu, “Epi ding a kei pen tah eiki sol ahidem” ti hi ahi. Ajeh chu chihna thepna hetna lam jong alhasam pen, Inn chen nei le gou a jong avai chapen a genthei pen tiin kana lung boi lkeh in ahi, chule agam pao (Nepali pao) la chang khat jong kahe pon tiin kana lung leng vai lkeh jeng in ahi. Hitabang a lunggel boitah le lung leng vai tah a kana um laitah hin Pathen houlim pina kachangin solchah Paullin Corinth houbung mite heng a, “NANGHON NAKIKOU DOLU HI LUNG NGAITO TEMUN” (1Cor, 1:26b), ati thucheng chu ka lung thim ah athah in ahung kilang in, kei jong kakigellin kangaiton ahileh Bible Collage a kana umlai apat a kana taona thupipen chule kana lung tuppen tah, muthim gam a dia vaikon ding eiki kouna thupi chu ka hin gel doh in Pathen kom a dilsun ngaidam ka thumin ahi.

Hichi nikho apat chun Nepal gam a chia Pathen helou, asempa koi ham ti-jong ngaito kha lou lai holah a Missionary a chi ding Gospel thupha seipih ding, eisem pao koi ham ti seipih ding lung thanup nale aphant lhin kal kana ngah lal lkeh jeng tan ahi. Phat le nikho ahung chal in 21st April 2015 nikhon damsung a ama lenggam na katoh khompi dia Pathen in eipeh kaloinu le kachapa toh kangailut Innsungmi le Houbung mitheng te dalhan Nepal gam a KBC Missionary ding in kapa in amun chen ei hung thah uvin ahi. Kalhun uvin hamle pao kahet lou jihin phat chom khat (1Yr) School ah teacher in ka pangin pao jil toh natoh kahin kop panin jochan in kaum na vel a chapang ho tuition kana bol peh in nule pa(Parents) hotoh relation kahin kistem panin ahi. Hichi lai a relation kana sem chu tuhin kei a ding in nasa tahin natoh machal nale phat chom nan ahung pong in ahi. Tuhin Pathen jallin hamle pao jong akham kham a ama hinna thupha sei doh thei na chule sei phong theina hing jing Pathenin eipe tan School lang kada lhatai Chule kaum na innmun ah Fellowship jong panthei in ka um tan thahat hansen na phatthei eichan Pathen kathangvah e. Chule a itih a jong ka chan khah lou chan loup tah tah jong ei chan in ahi, chi ho jouse lah a chun adeh in tulha Sept 19th- 22nd 2016 chun Gajuri Punaruthan Church Kathmandu mun ah “YOUTH CONFERENCE” ah jong “NAKHANG

DONG LAI IN NA SEMPA GEL DOH IN" (Eccl.12:1). Hichi topic mang chan agam pao(Nepali pao)ah kana kimang chan ahi.

Keima hinkho thusim kahin sei lona ajih pen chu Nepal gam adia solna kana chan chun agam pao het lou jih ahilou le hetna chihna thipna ema kanei poi tin kana kisong lal in Bible Collage kaum lai a kana taona ho jong kana sumil in lung thasetna jat chom chom kana neiin, Pakai in eiman nanom jong kana gel doh pon ahi. Ahin tunia Pathenin ka chungu thilpha sim joulou eichan ho jalla Hichi Topic "PAKAIYIN MAN NA NOM NA NEI E" ti mang cha a houbung mite eki til khou nom u ahi. Ema lou a kakigel lai tah ajong aman man na nom ei nei e, nang jong na mang nom inte tin katasan e. 1Cor.1:27 ah chun hitin aki mui, "Ahi vang in Pathen in michingtah miho chu jachatsah na ding a van-noi leiset'a angol teho alhena; ahat apaoho jachatsah na ding a van-noiya ahatmo teho alhen ahi". Hi-jih chun nang jong ema kanei poi hetna chihna thipna ema kanei poi tin kisong lal hih in pakai in man na nom na nei e, na ki kou na ahilou le

Pathenin epi ding a eistem ahidem ti tunin kigellin.

Achainapen in Iki kou dolu ingaito khah tah uvem? Ingaito khah lou u leh tunin Pathen ang sung ah kisu-nem in kingaito phaote, ajih chu Pathen in man nanom nei cheh a eistem u ahi, ama nu ama pa bou aman nom ahi poi nang le kei jong ei mang nom uve ti sumil poute. Keiman jong Pakaiyin man nanom einei nale eikouna kana gel doh lou kana ngaito khah lou jih in lung boina lentah kana nei in ahin kahin gel doh phat in tahsa le lhagao a lungthim kipana, chule aleng gam adia vaikon thanop na kahin nei in, chu jong le Phat thei nale vangboh na jong tampi tunin eikipeh bein echan jing in ahi. Nang jong Pakaiyin Man nanom nanei e nakou na chu phaten ngaito phan.

Kakipahe asim jouse Pathen in houlimpi henlang phatthei boh cheh taken.

Pakai Lengpileiya kon Keima,

Pr. Lunminthang Haokip
Missionary to Nepal, Panchthar
Mission Field

LEKHABU THAH MUTHEI HITA

Evan. Paolam Kipgen B.Th., M.Div Chaplain Elijah Prayer Mountain, Gothol, CC.Pur in ajih

"SEIJUI 12 HO HINKHO THUSIM"

(Second Edition)

seijui ho thusim lhingsetna kijihna le alim mu chuleh Martyr achanna lim kicheh tah a kimuna Lekhabu thenso hita !

Hetbenom neihon Mobile No. 9862274215.

MEN COLUMN

August 26-28, 2016 sunga Gambih No.5 Men Secretary Tour Report.

26 August 2016 nin Pu Holpao Haokip le keima Gambih No.5 a Tour boldin kakal song lhonnin Gambih Pastor Lalboite Insungin eina ngah un, nilhah in L.S. Sehjang Houbunga kakimangcha uvin, August 27 nilhah in Maohinga kakimangchauvin, 28 jingkah in Gopibung chule 28 nilhah in Keithelmanbi a kakimangcha uvin, Pakai jallin Gambih No.5 sunga Houbung hon neh le chah tuitah tah eieh sah uvin, amaho jallin Pathen kathangvah'e. 27 jingkah in Gambih No.5 Pastor te in an tuitah eieh sah uvin Pathen kathangvah'e.

Tour sung nga eikilhonpi uva Gambih Pastorpa le Men Work Committee ho, chule lhunna gena a kanei'u C/C Kangpokpi Pastor Lalboi Hangshingleh Houbung mite chungga jong kipathu sei joulou kaphonge. Pathenin phatthei naboh jing taohen.

Men Work Committee Tour Report.

Amasan damna hinkho eimusah uvah Pathen chu thangvah in um taken. 2016 sung jong Men Work Committee Tour jo channa bolding akiti bangin Gambih No.12 jong boina ima umlouvin akiche theijin ahi.

Convention Men Work Committee ho leh Gambih No.12 Pastor, Rev. Tonglal Haokip leh atokhompni Men Work Committee ho toh Group thum min akihom khennin Gambih No.12 sung Tour jochannin go le dai kai jongleh thoh pum min pan akilain, Houbung mite toh Pakai jallin nomtah in akikimangcha in, chuleh lhunna gena neh le chah tuitah leh kitup tah in eibol peh un, amaho jallin Pathen kathangvah'e.

Pathenin phatthei boh jing taohen, Amen.

Pakai Lhacha,
Rev. Kamboi Chongloi, Secretary Men Department, KBC.

Houbung mite ho henga Chagate Nikho thua Hetsah le Taona

Amasan imunpiu KBC Office a konin KBC Houbung mite ho jouse ngailut na Salaam Pakai minin kahin pechek uve.

Tunia nahenguva kahung tao na nom pentah chu tukum KBC Events Calendar dungjuija hi tu ahung lhung ding October 23rd, 2016 Sunday nikho hi Chagate Nikho hung hiding ahitan, tukum hi Programme atuma hung kisem talouva akho akhoa Houbung miten eima kigon dungjuija Taona le thilpeh a inaman cheh diuva kahung tao ahije. Tu tu jong hin KBC Nuten Lydia Resource Centre a Training ho lah a jong Chaga nule pa neita lou mini Free a Training ipeh uva, aneh achah chule adamlou chan geiuva iboipiu aumin ahi. Hijeh chun muntin'a Houbung mite jousen igam sunguva nule pa neitalou muntin a chaga genthei hoa dinga ibol thei penu taona le thilpeh to thoa hiche nikho hi ina manchek diuva avel a taona hung kinei ahije.

Kipa thuseina:

1. L. Sareikhong B/Church KBC No. 2 Nuten achesa nisim 10th Sept, 2016 2nd Saturday nikho hin Lydia vilna ahung neijun, Chate ho dinga taona le tilkhouna ahung nei un, Anchang Bag khat le Rs 2000/- jong ahin pouvin ahile KBC Nute ho jouse thalhengin achunguva kipa thu Pakai minin ahung kiphonge. Pathenin amichang cheh hinkho le Nute kiloikhomna phatthei bohchek tao hen.

2. Makhao Tampak B/Church No.11 Nuten achesa nisim 24th Sept, 2016 Saturday nikho hin Lydia vilna ahung neijun, Chate ho dinga taopeh na le tilkhouna ahung nei un, Rs 500/- jong ahin pouvin ahile KBC Nute ho jouse thalhengin achunguva kipa thu Pakai minin ahung kiphonge. Pathenin amichang cheh hinkho le Nute kiloikhomna phat thei bohchek tao hen.

WORK COMMITTEE TOUR REPORT:

1. Achesa nisim 30th September, 2016 Friday nikho hin Women Work Committee Tour KBC Gambih No.12 Khopijang Baptist Church muna akichen, Houbung Deacon Board hon vailhun na phatah in eina neijun, Gambih sung akho akhoa Nute ho le khonei Houbung mite toh nilhah in Gambih No.12 Women Chairperson nu lamkaina in kaikhom na akineijin, Solo Khonei haosapi NI, Toto Haokip akingaijin, Work Committee hoa konin jong Pathen vahchoina la akingailhan, Women President Pi Boicie in Tour kibol lona le adang kihetto louva khoh ho hilchetna aneijin, Pathen thua houlimna Women Secretary Ng Anem in aneijin, kipah tah in akiki mangkhomin Pathen thangvah aume.

2. 1st, October, 2016 Saturday nikhon jingkah in KBC Gambih No.11 Taokhomna Program kahin del un, H.Gamnom Baptist Church mun'a Gambih An-ngol taokhomna le Tour program



joint in akimang khomin, Pi Hekim Work Comtt, lamkai na in kaokhom na chu akineijin, M.Tampak Nuten Pathen Vahchoina la ngeitah asaovin, Convention Women Secy, nun Tour kiche lona ho hilchet nale kihetsah to louva khoh aseijin, Women President Pi Boicie Haokip in Pathen thua houlimna "Nu mantam dan" ti thupi mangcha in tilkhouna ngeitah aseijin thanom tah le kipah tah in akiki mangchan Pathen thangvah aume. Pathen ikiloi khomnao Kuki Baptist convention, Nute phat thei boh jing taken.

Pakai lhacha,

Lhingjanem Haokip

Secretary, Women Dept, KBC

SECOND ROUND

LOLHINTAH A KICHAITA

YOUTH COLUMN



Zai-them Second Round chu achesa September 11 nikho chu KBC Centre Church, Molnoi Area mun'a lolhing tah in mihem asang aja masangah ana chellha tan ahi.

Centre Church a Pastor pa le atohkhompi lamkai chengin amunle manchah ding thillelo ho eiphal peh uva, chule nehle chah jong kituptah gena touna jong lunglhai umtah a eigonpeh naujallin kipathu akiphongin ahi. Chule Gambih Pastorpa le atohkhompi Gambih lamkai chengin jong Gambih sunga hitobang kingon kibolna eihetpeh uva, eihatpeh uva, pan hatah a alahnau chungah hin kipathu sangtah in akiphong in ahi. Gambih Youth te le Centre Church Youth ten natohna hihen, ahung ho nehlechah, lhunna gena ding hijongleh ninglhing setna agonnau chungah hin seijoulou kipana sangtah akiphon kitne.

Milun Jaum'a kikou hon jong phatah a aphantmun u eilopeh nau chungah akikipah mama jengin, Convention Youth te ngailutna jalla pan alahnau chungah jong seijoulou kipana achung chehuvu akiphongin ahi. Munchom chom'a kon hijongleh Gambih le Centre Church a Pastor hole Secretary ho jong akimuna chungah kipana seijoulou akineiye. Media lama jong mopohna eilahpeh uva Daily News a eisopeh houchungah jong kipana sangtah akiphong in ahi. Chuban in Judges hon jong Zai-them ho ngailutna jalla tomngaitah a pan alah uva, chule tilkhouna thuho jong aseiuva, ngainom umtah tah thucheng aseidoh nau chungah jong kipana sangtah akiphonge. Compere tenin jong mipi lunglai tongkha theileuva lamkaina aneilhon a mipi thanomtah a ana koilhon jalchun mipi alungna achim mama jengin, amani chungah jong kipana sangtah akiphonge.

Second Round Report:

- Contestant mi 32 a kon in lasahna ana umme.

- Contestant mi 32 lah a chun mi 12 lhenlhah ana hitauve.
- Judges 3 ana kikou vin amaho chu ECA, KCC le Independent houbung a kon ahiuve.
- Lasalui le lasaminthang Lynda Haokip in jong Pathen vahchoila anasai.
- Best Performer of the Day chu Gl. Letminthang Haokip, Gambih No. 13 anachangtai.
- Lhenlhah hiho chu dangka 500/- cheh toh Peticipation Certificate khatcheh ana kipen ahi.

THIRD ROUND



@ VENGKOM COMMUNITY HALL, CHURACHANDPUR

LHUNGKIM	: 12 October 2016, Wednesday
ANIKHO	: 13 October 2016, Thursday
KIKHENN	: 14 October 2016, Friday

Hetdiapha:

- "Best Performer of the Day" jong kilheng kitding ahi.
- "Best Duet of the Day" jong kilheng ding ahi.
- Top 10 lhendohna jong umding ahitai.
- Top 10 kilhengdohho hetpehna thilpeh jong umding ahi.

MUNJOUSEA MIJOUSE AKILEMCHEH-E. HUNGIN HUNGPAINGIN.

YOUTH DAY 2016

Youth Day Thupi: "Pathen Lungdoltah" (Acts 13:22)

Anikho: 9th October 2016, Sunday

Pathen in eihin puijungun, hito lhon chun ahung lhungding Nisim 9 October 2016, Sunday nikho hi KBC Calendar of Events dungjuiva YOUTH DAY hiding ahitan, muntin a Houbung mite jousen ina mancheh diuvin jong temna sangpen kahin neiyin ahi.

Hiche nikho hi Youth-te nikho ahijeh in thanom tah in kigou'tin, chule Programme jong anop natheiya ina kigon cheh diuvin jong temna jong ikinei uve.

Hiche nikhoa Speaker jousen jong Youth toh kisai jeng iseidoh cheh uva, Youth-te tilkhouna, hilna jong inei uva chukeu hilouva Yo uth-te taopehna jong ina neicheh diuvin hetsah nale temna sangpen jong iki nei uve.

Taona a Geldoh Dingho:

1. Kum sunga khangdong mollem ho geldohna neiding.
2. Nungah gollhang houdanthenga jinei tamna dia taoding.
3. Khangdong sunga Pathen lhacha natong ahung kisepdoh nading.
4. Khangdong sunga aching athem ahung tam nading.
5. Nulepa kinepna molso khangdong ihijing nadiu.
6. Kum tohgon ineihou molso a aumthei nading.
7. Khangdong simlai, service bolho le company a natong ho ding.

NOTE: Youth Day nikho Offering jong houbung tin'a neihin bolpeh cheh diuvin jong Pakai min'in temna ikinei cheh uve.

LITERATURE COLUMN

SUNDAY SCHOOL AWARENESS SEMINAR

2015 kum'a kon'a gambih Level'a kibol banjom'in 30th September, 2016 ni chun Centre Church, Kangpokpi (Kang-gui) mun'ah Gambih No. 4 & 5 kigom'in Sunday School Awareness Seminar anakibol'in, lolhing tah'in anachelha'n ahi. Gambih Pastor ho, Gambih lamkai ho, Houbung lamaki ho, Suda School Superintendent ho le jilkung ho tomngai tah le thanom tah in thalhingset'in ahung panguvn, Programme nasatah in alholhin sah lheh jenguvn, achunguva kipa thu sangtah in kiphonge.

Centre Church, Kangpokpi Pastor Khuptinlal (Lalboi) Hanghsing le atokkhompi Houbung lamkaiho, chule ahung kikhom mipi ho jen'na'a cha om le Sound System'a ei kisah boipi ho'u chungu kipa thu sangtah in kiphonge. Kikhop'na'a neh le don, tha le jung, chule

sum le paiya pan eilahpeh Jal'un Centre Church Kangpokpi te chungu kipa thu sangtah in akiphonge; Pathen'in Houbung mite phat thei boh henlang, mapui jing taohen.

Resource Person a pang Dr. Haolet, Chairman, Literature Committee, Rev. Silas J. Haokip (Boipu), Director, Shalom Bible College le Pastor Haoneo Haokip, Literature Secretary ho'n jong pontho tah'a pan eilahpeh jeh'un achunguva kipa thu sangtah in akiphonge. Kikhop'na'a pontho tah'a phat homtoh'a eihung panpeh'uvah Pu Jamsei Haokip, Literature Committee Member chungu kipa thu sangtah' in akiphonge.

Seminer a chun Resorce Person ho Paper/Class to kilhon'in akikhom mipi (Participants) ho toh KBC Houbung ho'a Sunday School khantou machal'na ding lam thu'a giltah in lung gelkhom 'na le seikhom'na akineiyin, aphachom l'heh in ahi. Pathen lungse jal'in lgamsung/i-Houbung houva Sunday School lam gelkhoh'na ahung umjep jep tan, imachalbe diu kinep aum'in, imachalbe jing theina dingun Pathen'in eimapui jing ta'u hen.

Haoneo haokip
Literature secretary, KBC

SUNDAY SCHOOL DAY

(13/11/2016)

Houbung mihte jouse Pakai min'in ngailut'na Chibai kahinpe'uve!

KBC Events Calendar'a kipe dugjuiyin, ahunglung ding 13th November, 2016 (Sunday) nikho khu tukum (2016) sunga dinga Sunday School Day (Literatue) iman'na diu nikho ahung hita'n ahi. Hito kilhon chun, KBC General Assembly, Centre Church, Molnoi Area a kiphatsah'na dungju'a tukum (2016) a Sunday School Day a kimanchah'na ding dan KBC Office langa Literature department'a kon'a gon'a kitoh tah'a mading ti'a kiphatsah'na dungjuiyin anoiya bangin kimanchah'na ding dan ahung kigongin, Houbung ho jousen ahung kigong banga hiche nikho hi thon louva pontho tah le thanom tah'a inaman tei diuvin Pakai min'in tem'na ahung kineiyin ahi.

Thupi: Pathen thu'a kipuihoi hi hinkho semtup'na le kistem-phat'na lampi phatah ahi (2 Tim. 3:16 Cf. Deut. 6:4-9)

Speaker: Ama, ama Houbung'in pha ati dungjuia ahithei ding mi akigon ding/Guest Speaker kou nom ho'n KBC Pastor/Gambih lamkai/Convention lamakai ho akikou thei ding. Houbung phabep'a Literature Committee Member ho le Office'a Department Secretary ho le adang dang (Director, Co-ordinator, Assistant) ho Guest Speaker'a hung ding (Hiche hi ahung kigontoh dungjuia ahung'na diu Houbung ho hung kihetsah ding ahi)

Jingkah le Nilhah Kaikhom: Jingkah le nilhah kaikhom'na ho'a kimanchah'na ding (Detail Programme - lamkai ding, Thangvah'na tao le phat chai'na tao, tokhom thenso taona mang dng, labung/Spaacial No., Scripture Reading etc) ho hi ama, ama Houbungin ahi thei'na dol to kitoh'a akigon ding.

Sun'a Kimanchah Ding Dan: Sun a hi jil-lai ho Class/Group dungjuia kitet'na jat (Competition Items) chom chom - Lungchin chang, la (Solo/Group/Action Song/Choreograpgy), simmun thu ho to kitoh'a thudoh, Skit le adang dang phat'in ato dungjuia man ding ahi. Hiche kitet'na lah'a 'Thudoh' na'a hi pilhing Class ho'n jong pan alah diu ahi. Hiche kimanchah'na kin gontoh le mopoh'na hi Sunday School Superintendent le jilkung ho kithokhom'na hiding ahi. Kitet'na'a pachan'na sangpen nei (First second, Third) ho akham kham'a kipaman (Prize) gonpeh ding, nilhah kaikhom tengle hoppeh ding ahi. Ahithei le akikhom mipi ho dinga kipah thanom tah'a cha donkhom'na gonding ahi.

Hiche nikho'a kimanchah'na ding hi Sunday School Suerintendent le Deacon Board ho kithu toh'a phatah'a mancheh dinga tem ihi-ue. Hiche nikho'a hi tokhom (Collection) phatah'a ihinbol'uva KBC Office (Fianance Section) a Casheir kom'a ihungthah cheh diuvin Pakai min'in ikitem'uve.

Pakaiya Natokhomp'u

(Paokhohao Haokip)

Secretary, Literature & Publcation.

TONIC SOLFA

COMMON EXAM THU'A HETSAHNA

Youth Department in tukum 2016 tohgon khat'a kinei Tonic Solfa Common Exam bolding kiti chu tu ahunglung ding October 21, 2016 (Friday) nitengleh Pathen in pha asah leh KBC chapel Hall, Imphal mun'a conduct kibol ding ahitai.

Hijeh chun eiho KBC sunga minu, mipa, chuleh nungah/gollhang koi tobang Solfa lam'a ichan hetna kanei hitam, hoilai class kaphah hitam ti hedoh theilou tamtah iumnaova kon sutlhaph theina din hiche Exam hi ihung bol diuvin ikitem'uve.

Exam dinga Suggestion:

1. Rext book kimang ding chu:
 - a) KBC in Edition abol 'STAFF NOTATION LEH TONIC SOLFA JILNA VOL.II
 - b) 2013 kum'a Sunday School Tonic Solfa khutchoibu publish kibol
 - c) ECA Music Department in asem "Music Khutchoibu (Tonic Solfa) hichenga kon Question setting kibol ding ahi.
2. Exam hi date 21 Friday 11:00 Am tengleh kipan ding ahi.
3. Exam kibolpeh ding class chu Junior-Intermediate chan hiding ahi.
4. Exam hi Theory (jihtho) leh Practical ania kibol ding ahi.
5. Exam'a lolhingho KBC min'a Certificate kipe ding ahi.
6. Text book ngaicha aumleh KBC Office mun'a kilah thei ahi. Question set kibol na ding text book athum'a muthei ahi.

Kijah mat to nathei:

9402243389 - Youth Secretary
9862539378 - Music Master

Pakaija natohkhompiu,
 Gl.Haoneo Baite, Music Master, KBC (India).

KBC Workers Retreat 2016

Report



Kumseh a kbc pastor ho le office staff hon pathen natoh na a machalna anei jinguva a phat phata lhagaole tahsa a kisuhtouna anei nadiu va anakiche pe jing "Workers Retreat 2016" chu pathen panhu na jallin Taona moul kbc in anei sun Elijah Prayer Mount, Gothol a 19-21st Sept. sung chun lolhing tah in ana kichaitai.

"Nalung thim pumpiuvin anngol to thon kahenga hung kile kit uvin. Joel 2:12" kiti thupi mang chan Rev. Ngamjapao Haokip kbc Gen. Secretary thupi sei jin apangin ahi. Rev. D. Doungele le Rev. Thangsatsat Kipgen Devotion lamkai jin apang honin chule Rev. Kamboi Chongloi, Rev. Paojangam Haokip chule Rev. Onthang Haokip Taokhom lam kaijin apangun program lolhing tah in anachelhai.

Hiche Retreat a hin worker 82 lahin 79 ahung pang thei jin Pathen ithang vahuve.

Speaker pu pathen in amang chan ama akon convention worker khat hina a hetdinga kilom tapi hetthem na akinei jin chule lhagao hinkho ajong kisu hal na lentah eipeo ve. Ama pathen thua houlim na anei keo hilou vin achainin Camp fire ahin gongin hia chun worker jousen Pathen na hat be cheh a tong din kigel lhah na anei jun mabana convention sunga khantouna lentah ahin pohlut diu kinep aum e.

Hito kilhonin Taona moul khoh sah na jalla nikho tha khat hung tohdoh C/c Tuibong Baptist youth Dept.te chung a kipa thu akisei je.Amahon Date 10 Sept.nichun taona moul le lampi suhtheng chule lhanghoh in asuhset lampi ho dip chamna aga neijun ahile taona mang dinga che kbc worker ho jouse nomtah a lamlah thei na eibol peh un ahi.

Kumseh le Taona moul a Retreat program akiche teng mi-jouse lung donna pen chu Songdo Army camp pal hi anahi ji.Tuchungin Songdo houbung le haosa pu pan halah na jallin chele valle na noh phah lou hellin lam eizat peh un,chukeyo hilou vin Army camp phahmasang waiting shed a houbung miten lamto na eina nei jun taokhom dia che kbc worker ho jouse thei-tui khat cheh don din eipe kit un ahileh lungmon aumlheh jeng in Songdo houbung mite chung a kipa thu sangtah akisei jin ahi. Pathen in kbc phat thei boh jing taken.

Reported by
Rev. Henjalen Dounjel
Program Co-Ordinator

MBC SECRETARIES CONFERENCE REPORT

Achesa 23 - 26 September, 2016 sungin Senapati District sun-ga Mao jat miho lah a Houbung masapen, Punanamei Baptist Church mun'a ana chelha Manipur Baptist Convention (MBC) Secretaries Conference kiti MBC noiya kiloikhomna'a bahkai ho'a Secretary ho jouse kikhop'na'a chun, KBC a kon'in Rev. Onthang Haokip, Secretary, Education Department; Ms. Anem Haokip, Secretary, Women Department; Rev. Henjalen Dounjel, Secretary, Mission Department; Re. Kamboi Chongloi, Secretary, Men Department; Pastor Haoneo Haokip, Secretary, Literature & Publication; Pastor Henkholen Kipgen, Development Co-ordinator; chule KBC Driver Pu Laisei Chon-

gloi le Pu Holpao Haokip jaona'n agom'in mi 8 (get) 23rd. Sept. 2016 ni chun aga kikal kolsongin, 24th - 25 Sept. 2016 sungin kikhop'na'a chun pontho tah le nomtah in aga ki-kimangcha'in, 26th Sept. 2016 ni chun damsel'in Kikhop'na mun'a kon'in imlam'a ahung ki-kiletai.

Tuchung MBC Secretaries Conference a chun Pathen thu le la'a kiloikhom'na ho'ah Rev. Dr. Jolly Rimai, Mission Secretary, CBCNEI chu Main Speaker in apangin, Philipians 4:7 a kon'a kiladoh "Call to Holiness" (Atheng dinga Kikou) kiti thupi'a kon'in thuseina aneyin ahi. Pathen thu le la'a kiloikhom'na chung chon'in MBC kiti'a kiloikhom'na sunga kivipoh dol le tahsan lhongpi'a kitup tah'a chekhom ding dan, chule Manipur gam'a MLA Election ahungnai tah to kilhon'a Clean & Fair Election (Dihtah le thengtah'a kilhen'na) a-um thei'na dinga MBC Level'a Houbung ho'n pan iti lah ding ham, ti thu ho'a gelkhom/seikhom'na (Consultation) thupitah in akinei-yin ahi. Hiche kikhop'na'a kon'in kivaipoh/kivai hop dol le thusei lasah, chule thil dang dang tampi'a kon'in phatchom'na le khantoube pi thei thil phacom tampi mudoh le jildoh be theiyin a-um'in aga-kalsong ho'n akiphatchom pi lkeh jenge. Conference um'na Houbung (Host Church) mite'n thu le umchan le thilpeh to tho'n phatah in mi lem mijen abol'un, neh le chah lam'a tuitah le nengtah in mi jen (Hospitality) phatah in abol'un, phat onkah lah in mun le mol ve (Sight Seing) in eipuiyun, tahsa kisuh lip'na'in kichep golnop (Swimming Competition) abol'un, hatman le kipa man (Prize) hoitah tah ape'uvun, lam le la in Cultural Show hoitah tah ho jong lunglut tah le phatah in abol'un, pontho tah le gunchu tah'a pan alah'na ho'u vetjui thei tah le kitilkhouna thei (Challenging) tah khat ahi. Damsel'a lolhong tah'a kimang cha theiya eikoi jal'un hat chungnung Pakai Pathen choi-at'na le thangvah'na ipe'uve.

Pastor Haoneo Haokip
Literature Secretary.

Ngavei channa KBC Gambih No.16 Men Department An-ngol Taokhomna chelha ta.



Amun : Bongjang Baptist Church
Anikho : August 6, 2016 (Saturday)
Aphat : 8:00 Am - 02:00 Pm.

Target Bidoi: Gamsunga taona O gin thipsah louding
Thupi : Pathen toh Kichamun (II Cor. 5:20)

Pathem mapuina jallin tuchung Gambih No.16 Pate An-ngol Taokhomna damsel in akichaitai. Chule tuchunga taokhomna a kidangtah khat chu tumasanga jong ana umkhalou beh, Gambih hop sunga taona a hungpangho: (1) Haosa ho jouse (2) Board of Deacon jo jouse (3) Gambih Executive member ho jouse (4) Houbunga Pate lamkai jouse (5) Gambih sunga Upa tehse kum 70/80 chunglam chule Upa changval ho Women Department ho jong thanom tah in ahungpanguvin mi 142 ahung kikhom doh'e.

Bongjang Houbung mite panlahna jalin Programme lolhingtah in akichai in, chule ahung jouse jong thanom tah in ana lemun, nehding donding jong lhingset in ana gonguvin, taokhoma hungpang jouse jong achunguvah kipathu akisei khom'e. Chule atumben in jong Gambih Men Department in jong ahung kikhom jouse le Houbung mite ho chungu kipathu kahin phonguve. Bongjang Houbung damsot hen.

M.Thongpao Zou
Chairman.

ST. Semkholun Haokip
Secretary.

CENTRE CHURCH HO HENG'A HETSAHNA.

Phat masan Houbung mite nabon chaovin i-pakai Jesu Christa min in kangailut nao leh kajanao salaam kahin peu've. Houbung sung thu le la thusei lasah tahsa le lhagaova lung monga na um dingu kakinem in, hijeh chun damna le phat pha eipeuva, Pa, Pathen kahin thangvah in ahi.

Tunia Houbung mite henga kahin hetsah nom chu ahileh, Pathen in phat pha eipeh'uva Houbung Annual Assembly inabol thei nah'u leh Convention langa Secretary ho hi Ex.Officio a ikou dingu ahi ti inasuhmil lou ding'u ahi. (Ref. Constitution book page N0.18: A-1V).

Centre Church hon tukum'a kipatna Constitution phatah'a ijuipat dingu ahi, hijeh chun Annual Assembly phat hi Head Office lang ho toh kihoutoh masah'a aphot fix ibol diuin hetsahna toh thon temna ahung kineiijin ahi. Phat dang kum dang in ana kijui tahih jongle tukuma patna Centre Church hon Ex.Officio pang louva Assembly ibol tah lou diuin temna khou tah ahung kineiijin ahi. Iham tia Secretary ho ahung pan theilou ding jongle kihet tona dungjuija um ding ahi.

Avellin Houbung mite jouse nabon chaovin damsel un lang pathen in na umpi jing tao hen. Kisei ngai kitih leiset chungga thahat na ahin, Pathen chate chon na ding dol jong ahi.

Kakipah'e, Salaam.

Pakaiya natohkhompiu ,
Rev.Ngamjapao Haokip
General Secretary
Kuki Baptist Convention.

Maokot houbung leh Lakhan houbung anngol taona



Pathen lungsetna leh mapuina jalin KBC No. 17 Chassad Area a houbung ho chuleh gambih level in jong anngol taona ana ki-mang jinge. Houbung jouse hin lhakhat a anngol taona khatvei cheh akimang in, gambih level in tukum adin 2 vei akimangtai. Gambih level a manding gam hahsa ahijeh in ahahsat na tampi aume. Ahin gambih ngailutna leh khoto nan mi jousen pohnatna anejuvin, hiche hin taona amachalsah ahi. Adeh in KBC seh hilouvin Kuki chate jousen hetdia pha chu ahileh Chassad gamkai ja Kuki chate hi hon lhomcha ihuvin, chiding-namdang te letna leh lalna noiya ki khosah ahi. Kuki chate chenna gamle leisethunoh-baotam laitah chun atamjo eilah peh taovin, tua hi



Kuki chate kho agoma 15 bep bou ahitai. Hiche kho lhomcha jonghi chenkhopi sopiten ei ningsuh suh jengu vin, iti leh aning akihal uvin akichaodoh diuven tia lungthim thuh tah a tohgon aneijing uve ti ana heu hite. Hijeh a hi anngol taona

akikhoh sah in, chule vannot gamtin a Kuki chate henga taona chu ahileh hitobang ipu-ipa gam hi ichaan louna diuvin taonan geldoh jingu hite ti hi temna ahi.

Anngol taona thahat dan akidange. Tukum atric le PUC exam a chun Kuki simlai chapang ho result hoitah in apachang taove. Hiche hi tu masang a chu ana um khalou lai ahi. percentage a ivet leh 95 % tobang a pass in, position jong sopite sanga Kuki chaten asang lam achudoh tovin ahi. hiche hi sopite lungdonna lentah khat ahitai. Pathen in Chassad gam avilpantai ti hi kichentah in akimu pantai. Lhang haosa hon jong ju le sa angapan taovin lungmon aumcheh cheh jeng tai.

Tu a Chassad gamkai langa ngaichat um phabep ho ahileh:

1. Pakai a dia sepai gal hangsan- pastor, evangelist, missionary, etc...
2. Officers/lekhatem- Pathen ging khencha hinkho mangding IAS, engineer, doctor, etc..etc...
3. Pathen ging khencha hinkho mangding MLA
4. Pathen ging khencha hinkho mangding haosa, VA, nam natong ho, etc..etc...

Tu tu a naichat lenpen tah ahileh thinglhang langpeh a cheng Maokot, Gampal, Haijang, Mollen, Phungtha langhin kel alha in anneh le twidon ahah sa lneh jeng taove. Chassad langpeh a pat neh le chah akiholu vin ahi. abangin Tangkhul te henga akihol uvin agenthei val jeng taovin. Anchang tin 1 holdingin ni khat lam mol leh lhang pal galkai ahiuve. Gam hahsat jeh in hungdoh taovin kiti jongleh igam uleh leiset midang ho a hi ding ahitai, hiche hi akiponan ahi.

Hijeh hin muntin a um Kuki chaten Chassad gamkai din SPECIAL tah in taonan geldoh u hite.

Pastor Thangneo Haokip
KBC Gambih No. 17, Chassad Area

Shalom Bible College FALL SEMESTER 2016

lolhingtah in chai ahitai

2010 kum a kona Shalom Bible College noiya kum khat'a semster 2 ana kibol jing, C.Th Degree program chu achesa nisim 22/8/2016 - 18/9/2016 sungin Centre Church Salem Sapormeina muna ana chelhan Pathen puihoina jallin lolhingtah in chai ana hitai. Jilkung mi 6 noiyah



simlai 33 hon kichuhna ana nei uvin ahi. Semester sunga subject khat'a choi dinga jong phat le nikhon ato joulou ahivanga simlai hon ajil diuva deisah topic/subject hoa jong simlai ho seminar akigonpih in class la dingin mi chom chom ana kikouvin ahi. Nisim 22/8/2016 nilhah in Rev. Y. Haokip, Chairman Theological Board in Fall Semester 2016 lhandohna anei in, ni 28 jou nisim 22/9/2016 nikhon Rev. Ngamjapao Haokip, General Secretary KBC in kumkhana ana neiyin ahi. Closing service nikhon Rev. Dr. Hawlngam in Project Shalom Library jong hondohna ana neijin ahi.

Tuchung Semester umdol kahin tahlang nom hochu

1. Tuchungin simlai akeh val inmun a apansa uvin, ahin amuna gehdan ho sangin jingkah teng ahung lhung masa jo jiuvin ahi.
2. Choiding lekhabu subject simlai ho chanceh a dingin akisempih in ahi.
3. Muntin a KBC houbung mite panlah dan aloupin ahi. Kipehna a kimu Rs.61,700/- sa Kg 51, Bongnoi (Everyday) Kg 9, sugar Kg 12, Ahlu 20 aphan ahi.
4. Amuna Houbung mite le Pastor pa chuleh a deacon ho panlah dan aloupi in ahi. Amaho panhu najal a lolhing ahi.
5. Avel a um KBC houbung holeh Gambih chuleh lamkai ho chungga jong kipana alen in ahi.

6. Sunday niteng houbung chom chom a simlai holeh Director pa aga kimangcha jiuvin ahi.

7. Tuchunga Pathen thilbol kidangtah khat chu Sept 1st week sung Manipur gamsunga bandh umding thu akihasei lleh jengin jilkung phailam a kon a hungji ho itiding hitam tia lungim tah a ana kiumlai in, ol ol in ban neichan bandh jouse lahdoh ahiuvin ahi. Hichehi Pathen in itaona asan photchetna ahi.

8. Convention lamkai ho kithopina alen in ahi. Pu General Secretary, office a Secretary ho chuleh staff hon panhu nathei jouse ah eipanhu uvin ahi.

Maban a jong Pathen lengam a dingin tohgon tamtahinei nalai uve.

1. Tuchunga kichuhna hungnei mi 33 hon kumkit March - April sunga Semester anivei na dinga hungkit diu ahi. Taopih uHITE.

2. Kumkit June 2017 apat a Comtemporary Campus muna B.Th program ipatdiu ahitai.

3. B.Th program patna dingin Library ngaichat khohtah ahitai. Lekhabu alhompen a 10,000 (bu sangsom) ikhopdoh u angaiyin ahi. Tuchan hin KBC pastor mi 8 le adang mi 3 akon in lekhabu 1000 vel ahung kitohdoh tan ahi. Tamtah ngaichatbe ahi.

4. Pathen in permanent campus ding mun kilemtah le phatah eipeh nadiuvin taojing uHITE.

kakipah e, Pathen in KBC hi alengam machalsah houbung ahijom jing nadingin phatthei boh henlang umpi jing taken.

Pakai Lhacha

Rev. Silas Jangminlen Haokip

Director, Shalom Bible College

TUIBUONG C/C YOUTHTE CHUNGA KIPA THUSEINA

Achesa Nisim 10th Lhalem 2016 nikhon, i-taona Moullu (EPM) lampi selai ho semphatna le suhthengna ahung neinao chungah, eiho jouse thelhengin Pakai minin achunguvah kipathu seijoulou kahin phonge. Pathenin phatthei boh cheh taohen, Amen.

Evan. Paolam Kipgen

Chaplain cum Care Taker, Elijah Prayer Mountain, Gothol.

N. BOLJANG BAPTIST CHURCH KBNC No. 7

KITHAHSEM CAMP



Pathen lungset najal in KBC No. 7 a um N.Boljang Baptist Church mun a September 29 apat October 2 nichan in Houbung mite adin KITHAHSEM CAMP akibol in, Pakai Lhacha Rev. Lamkeng Gambih Pastor le Rev. Joseph Haokip, KBC Mission Assistant Speaker hinan akimang lhon in, Pathen in Houbung mite taona asan jal in lolhingtah in akichaijin, pengthahsa nunglhuh ho mi 20 val in kismethahna aneiun, penthah nailou mi 30 in Pakai Jesu chu Ahuhhingpu le Alengpa din akisan un ahi. Hiti ahijeh in kakipa nao jal in Pathen kathangvah un, kakipa nao KBC Houbung miho le hiche Thuso sim jouse hetding din kahinphong e. Kakipah e.

Head Deacon

N.Boljang B/Church, KBC No.7

PATHEN THANGVAHNA/KIPATHUSEINA

Rev Jeetan, Manipur Nepali Field Supervisor pa akon a kimu dungjujin,

(a) Mr. Bhupen Sonar, Litan Sareikhong, Assam Rifle Medical Department a natong chu Jesu akisan in, Thoubal Vadung a tahsan phondoh na Twilut abol in ahi.

(b) Ramesh Tamang, IT Road Tarbasti, Irang Part 1 a um jong chu Jesu akisan in, tuilut na kin bolding tohgon um ahijing lai ahi.

(c) Hindi Baptist Church, Moreh a Pate Camp abol na ah Mi 15 apengthah in ahi.

(d) Leplen Mission Field a um Kamal Tamang Missionary pu akon a thulhut chun Gollhang khat in jong Jesu akisan in Christian a lahlut ahitai.

(e) Anugra Church, Songjang a kon in Budhist background akon in Baptize achang taove. Pathen thangvah na nei jing pum in amalam hinkhou va ding in taopeh jingute.